

PROSPERANTE JEHOVA!

**APOLLO  
SILENS,  
SIVE  
DE ORACULORUM  
CESSATIONE,**

*DISSERTATIO ACADEMICA,*  
*Qvam*

Permissu Ampl. Collegii Philosoph.  
In Illustri & Regio Lycéo Aboënsi,

Sub MODERAMINE,

*PRÆCLARISSIMI VIRI,*

**DN. M. TORSTANI**  
RU DE EN,

Poës. Prof. Ord.

Publicæ bonorum censuræ modeste submittit

SAC. REG. MAJEST,

*Alumnus*

**ANDREAS CÆRLENDÖF**  
Wermel.

*In Audit. Max. ad d. 20 Aprilis, A. 1695.*

---

Impr. apud JOH. L. WALLIUM.

*Reverendissime in CHRISTO  
Pater ac Domine,*

**DN.M. BENEDICTE  
CAMEEN,**

Inclytæ Diœceſeos Wermelandiæ,  
Daliæ, Wikiæque Borealis Super-  
Intendens Eminentissime, Conſi-  
ſtorii Carlstadiensis Præſes Æqviſ-  
ſime, Gymnaſii & Scholarum per  
eas oras Ephore Optime, nec non  
Ecclesiārum Carolstadii, Kiih-  
lēnsisque Pastor vigilantissime,  
Mæcenas ſummo reverentiæ cul-  
tu æternum deve-  
rande.

**M**os erat antiquus, quoties sua Sa-  
cra litarent  
**T**hura, Sacerdoti summo pars  
prima dabatur.  
Iste sequendus erit mihi mos : Ergo  
Pater alme,  
Respice benigno has pagellas, inge-  
niqve  
Primitias vultu ; submissa voce preca-  
bor.  
Et patere hoc faciles conamen adire  
penates,  
Quod vestris longe meritis minus esse  
fatemur.  
Sic tamen ignoscas : &, qvando posse  
negatur,  
Respice velle meum : Sic Te juvet ipse  
JЕHOVA.

*Reverenda Tua Paternitatis*

cliens humilissimus  
AND, CARLEBDF.

Humanissime & Doctissime  
Dn. ANDREA  
CARLLOOS/

Amice sincere dilecte,

 uum siluisse doces furiatæ  
Oracula turbæ,  
Doctrinam prohibes secla file-  
re tuam.

Tui studiosissimus,  
Et juxta occu-  
patisimus  
scrib.

TORST. RUDÆEN.

§. I.



## §. I.

**N** Oracula Ethnicorum sub adventum Salvatoris in carnem subticuerint, et vetus est & non sine plurimo sententiarum divertio, agitata quæstio: cuius dirimendæ, consummationis esset iudicium opus quam nostri, quemadmodum nec illam nunc in nos provinciam suscipimus. Speramus tamen hanc veniam ut liberè liceat profiteri quid super hac re nos suadeant sentire ea, quæ tumultuaria lectione apud autores haud ini doneos licuit notare. Isthoc eâ à nobis modestiâ fiet, ut non modo patiamur quemlibet suo abundare sensu, verum etiam ipsi, ipso ostendamus opere, alterum non fore in monendo promptorem, quam nos in sententia nostra mutanda, siquidem meliora fuerimus edocti.

**A** §. II. In

In ipso limine tanto minus occupabimur circa vocum expositionem, quanto cuique notius est oracula solere dici responsa, quæ reddi consueverunt ore, vel ipsius Idoli, vel Antistitum ejusdem, qui seusus vocis nostro instituto est accommodissimus. Id forte altioris videtur indaginis & pretii majoris expendisse in antecelsum, an ejusmodi responsa, debeantur principio alicui supra aut præter naturam agenti, an verò technis & imposturis Antistitum, qui templis Fatidicis aut sortibus præfuerunt. Non nescimus plurimos, si non omnes primivæ Ecclesiæ scriptores Oraculorum intimutn autorem Diabolum pronuntiare, adeo ut ipse corporei idoli, & automati cuiuspiam membris fuerit usus ad responsa & vaticinia sua ebuccinanda; hominesque ipsi, quorum lingvâ & gestibus fuerit usus, sese habuerint merè passivè. Quorum etiam opinioni posteriores non pauci, plus forte quam par fuit, suam adjunxerunt fidem, nullo mo-

modo necessarium ducentes id aut probare, aut in rationes inquirere: quippe sat sibi sufficere prætendentes vel unicam hanc rationem, quod Christiani à primis ferè Christianismi incunabulis illam sint amplexi sententiam. Revelationes (quod semper monitum volumus:) divinitus inflatæ, quarum sacer codex locuples Gazophylacium est, hic non moventur: non enim sacra proflanis, aut veritas mendacio est immiscenda. Sed neque nos in solidum ibimus inficias, quin callidissimus tentator ritibus hisce à se incitatis suam operam potuerit commodaſſe, quemadmodum est myriotechnites, inque suo regno, quod in infidelibus obtinet, ampliando & firmando, sollicite circumiens leo: verum enimvero si possit demonstrari, aut nullum, aut certè paucissima ex istis Oraculis, quidpiam præternaturale sapere, adeo ut solis humani ingenii præstigiis artibusque versutè consutis hominum, magnam propterea æstimationem præ cæteris inhiantium, & etiam

numerous exinde captantium lucrum,  
 ( Ceu solidis etiam rationibus demon-  
 stravit vir experientissimus Antonius  
 Van Dale, opere, quod de Oraculis Eth-  
 nicorum inscribit ; & dudum ipsi quo-  
 que inter Ethnocos emunctioris nasi  
 homines, subodorati sunt ; inter quos  
 Demosthenes , qui Pythiam οἰλικῆν  
 querebatur , Cicero lib. 2. de divinat.  
 Lucianus in Alexandro Pseudomante,  
 Cælius Calcugninus de Oraculis. Dan.  
 Huetius Tom. Secundo prop: 9. C. 171.  
 §. 10. pag. 1089. ubi insigniter huic sen-  
 tentiæ favet. Et ipse etiam Eusebius  
 initio libri quarti de præparatione E-  
 vangelica de sacerdotum imposturis  
 multa & notabilia differit, licet in ista  
 tamen opinione permanerit, per ma-  
 los Dæmonas ea Oracula hominibus  
 redditæ fuisse ) Si inquam possit demon-  
 strari solam astutiam humanam his frau-  
 dibus texendis parem esse potuisse :  
 non video , cur ex solo placito nonnul-  
 lorum opinantium adigar ad creden-  
 dum contrarium, omnino de illa re ta-

cente scripturâ divinâ. Sed hoc, neque nostri est instituti, neque brevitas, cui maximè litare constituimus, permittit fusius tractare; hinc igitur digredi-  
undo, ad ventilanda (auxiliante DEO) ea properabimus, quæ de Oraculorum duratione dici posse videntur.

## §. III.

Laborat hæc quæstio, si ulla alia, di-  
versis diversorum assertionibus; Quan-  
doquidem vix sit, ut unum omnibus  
placeat, quæque huic minus adlube-  
scunt, ea alterius suffragium interdum  
mereantur maximum: Id vero dolore  
dignum videtur, quod opinio quælibet  
vulgo tanto judicetur verior, quan-  
to est antiquior, quamvis meritis inter-  
dum nitatur fabulis & otiosorum com-  
mentis. Ejusmodi autem inveteratae  
opinioni peneque Catholicæ obviam-  
ire, ac sele opponere si quis ausus fu-  
erit, solidissimis licet simul & acutissi-  
mis armis fuerit instructus, in contra-  
dcentium tamen incurret odium; &  
persona deinceps est defendenda, non

veritas. præcipue si antea viri majoris ponderis autoritatisque, contrariam mentem vel defenderint, vel saltem illi annuerint. Verum homini ingenuo & animi firmioris incumbit propter ipsam veritatem à veritatis tramite, contra apertam rationem non pati leullius autoritate abduci, præsertim. (ceu de me sum præfatus) ubi illa intentione & illo fine proponitur sententia, ut detegatur veritas, non ut exacerbentur animi tumentium contraria: Unde etiam benignum lectorem id existimare præopto, ea, quæ in sequentibus sum adserturus, in tantum à me adseri, in quantum depræhenduntur vera: Secus, palinodiam canere mihi non putabo turpe.

## §. IV.

In quæstione itaque: utrum *Oracula ad Salvatoris nostri JESU Christi adventum, quæ praterlapsis aëris usq[ue] putabantur, loquela perpetuo obsignarint silentio: An vero per aliqua temporis intervalla post auditas sint: Fateor me posteriorem haætenu-*

nus amplecti, utpote quæ graviori mihi visa est argumentorum pondere nititi: Quamvis prior altissimas jam agens radices, non minus a laicis, quam e fæce plebis elevationibus judicetur digna, quæ marmori inscribatur & Cedro, quod quo jure fiat, e re est ut paulisper examinemus.

## §. V.

Ex argumentis quæ defecum Oraclorum sub Christi nativitatem accidisse adserunt, firmissimum hactenus visum est Diaboli de se ipso testimonium: Puta, quando Augusto de Successore sciscitanti respondebat Apollo Delphicus sibi loquendi copiam nunc esse ademtam, seque ipsum ab Hebræo puer esse jussum redire ad orcum. Quod quidem testimonium adeò quidem mihi se non probavit, ut non scrupulus satis magnus restet. Nam quod Diabolus mendacissimus, mendaciique patet sui obstricti oris causam Augusto aperiret, & verissimum de Redempto-

re nostro ferret testimonium, vix capio.  
At ipsa audiantur verba.

Πάτεις Εργάσιον πελεταινα Θεοῖς μακάρεσσιν  
ἀνάστων  
Τὸν δὲ δόμον περιπέτειν, καὶ αἰδον ἀνθίσ μετατι,  
λουπὸν ἄπτει σηγῶν τὸ δόμων ἡμετέρων.

Quæ sic vertuntur à Johanne Mariâ  
Maravigliâ:

*Me puer Hebreus jubet hinc, Rex ille Deorum  
Tartareas remeare domos, bac æde relicta,  
Post terga ora tenens altaria nostra relinquas.*

Hos versus tales reliquit Suidas: alii  
( Nicephorus nimirum ac Cedrenus )  
aliter: Nam loco Θεοῖς habent Θεοῖς, ad-  
dito τε post περιπέτειν; item alter αἰδοῖον,  
alter ὁδοῦ pro αἰδον legunt &c. Re-  
centiores quoque varie, utpote depræ-  
hensiones secundum metrum vacillare, re-  
flectebant. Quorum J. Scaliger & I-  
saacus Casaubonus, abjecta voce παῖς,  
incipiunt Εργάσιος πελεταινα με Θεοῖς, &c. Qua-  
liter quidem versui consultitur, sed pu-  
er cogitur exulare, & sic tota labascit  
sententia, ut nihil nunc de cæteris ver-  
sibus dicam, quos quoque vari-  
andos

andos contendunt Schedius & Peuerus, ut habet antea laudatus van Dale. Quæ dilcrepantia non potest non esse malæ mercis nota. Qvod quoque modo fiet manifestius, cum protulero ea, quæ de hisce authoribus, Suida nimirum, Nicephoro ac Cedreno (ante quos hanc fabulam à nemine traditam haec tenus cognovit eruditus orbis) licuit notare. Quâ occasione id in antecessum monitum percupio, me eate-nus fidei habere scriptoribus antiquis quatenus sibi met invicem non resistunt minimeque à scripturæ literis aberrant. Quæ verò non de ipsorum, sed de seculis eorum ætatem longè antecedentibus, nullo idoneo teste, non aliter ac excogitata nobis venditant, cum judicio & cautè omnino sunt legenda, nec nimis temerè pro veris arripienda, ne veritati vis inferatur ; Quandoquidem, uti à nobis, ita ab ipsis nihil humani alienum fuisse putemus. In quos, Ze-  
lo quanquam haud malo, parum tamen

circumspecto imbutos, saepius non male quadrat istud Virgilii.

*Fallit te incautum pietas tua.*

§. VI.

Ac primum de Suida; Quo nomine non intelligimus illum Euboicarum rerū scriptorem, quem quoque Strabo Geogr. lib. 7. appellat authorem fabulosum citante Carolo Stephano, qui Suidas utrum ante Christum, an vero post eundem natum floruerit, est incertum. Sed est Suidas ille qui Lexicon, sive mavis historias compilavit, quem Vossius lib. 2. Cap. 26. de Scriptoribus Græcis tempore Alexii Comneni imperatoris, paulo ante finem seculi undecimi vixisse scribit. Ex eodem autem laudati Vossii opere passim est cernere, quam fuit iste in exscribendo parum sincerus, in quævis arripiendo imprudens & in judicando festinus ac temerarius. Alter est Nicephorus, Non Patriarcha Constantinopolitanus, qui nono seculo vixit, nec Gregoras, sed Callisti filius, quem Beza in notis ad

Cap.

Cap. i. v. 13. Actorum Apost. adpellat  
 ineptum & ridiculum Historiæ Eccle-  
 siasticæ Scriptorem, propter complu-  
 res fabellas & errores non exiquos,  
 quos in eo etiam Baronius, Possevi-  
 nus & alii dicuntur observasse. Vid.  
 Voss. de Script. gr. lib. 2. Cap. 29.  
 Is qvarto decimo vixit seculo. Unde  
 mirari sane subit scriptores adeò re-  
 centes potuisse comminisci rem, quæ in  
 Christi doctrinâ stabiliendâ tanti fuisset  
 momenti, & tamen a justino, Tertul-  
 liano, Teophilo, Tatiano aliisque scri-  
 ptoribus Ecclesiasticis, qui hos ætate  
 antecesserunt, nec his quidquam in de-  
 fendendæ Christianæ veritatis Zelo ces-  
 serunt, penitus negligitur. Verum  
 hanc debemus sanctissimo & miseri-  
 cordissimo Numinis gratiam, quod vel  
 absque talibus figmentis, adeò irrefra-  
 gabilibus argumentis eandem illustrarit  
 munieritque, ut infernorum portæ nun-  
 quam ipsi erint prævalituaræ. Cedre-  
 nns autem, qui tertius est, spud quem  
 iidem comparent verius, licet in non-

pau-

paucis variati, Vossio d. lib. Cap. 26.  
 putatur itidem fuisse undecimi seculi  
 homo. Sed qui Eusebii authoritatem  
 citat, in cuius tamen scriptis quæ su-  
 persunt, versus isti nusquam apparent:  
 unde suspicio est hunc Cedrenum non  
 fuisse feliciorem in citando Eusebio,  
 quam fuit, quum ex Clemente Romano  
 (qvem Paulus Phil: 4. 3. nominat inter  
 cooperarios suos & quorum nomina  
 sunt in libro vitæ) non mirabilia sed  
 miracula narrat de Simone Mago ejus-  
 que canē per Petrum iulſo uti hu-  
 mana voce, deceptus per recognitio-  
 num libros seu praxeis Petri, quæ falso  
 huic Clementi sunt adscriptæ, ceu egre-  
 gie docet Experientissimus Van Dale.  
 Quantumvis autem maximè concesse-  
 rimus potuisse Cedrenum ex aliquo i-  
 storum scriptorum Eusebii, quæ peri-  
 ère, hos versus notasse, quæſtio tamen  
 remanet eadem: Unde sc. Eusebius il-  
 los habuerit, qui non nisi quarto post  
 Christum seculo sua scripta concin-  
 navit? Sed neque illud fraudis suspicio-  
 nem

nem parum auget, quod metricum hic  
reponsum Delphico Apollini tribuatur,  
quem tamen metrica loqvendi ratione  
destitisse Pyrrhi jam temporibus, qui  
(nisi computatio nos fallit) tertio re-  
tro seculo ante natum Christum floruit,  
testis est Cicero lib. 2. de divinatione hæc  
dicens: *Primum Latine Apollo nunquam  
locutus est: deinde ista sors inaudita Græ-  
cis est.* Præterea Pyrrhi Temporibus jam  
Apollo versus facere desierat. Et quæ se-  
quentur lectu dignissima super illam  
quaestione, cur *Oracula carmine reddi  
desierunt;* quæ sane valde insulè allegat  
Mornæus lib. de veritate Christ: Relig:  
Cap: 32. post fabulam de puerō Hebræo,  
tanquam si de Oraculorum totali defe-  
ctu locutus fuisset Cicero, eum in finem,  
ut fidem conciliet opinioni suæ. Ver-  
ba sunt: *Et Cicero suis temporibus, quæ  
tam acuratè descripsérat, Oracula ubiq; de-  
fecisse testatur.* Sed audiamus iterum  
ipsum Ciceronem eodem lib. suo 2. de  
Div: *Sed quod cagut est, cur isto modo jam  
Oracula Delphis non eduntur, non modo no-*  
stra

stra ætate, sed jam diu: jam ut nihil possit esse  
 contemtius &c. Ubi omnibus liquet illum  
 nequaquam mentionem de ejus taciturnitate facere, quod patet ex voci-  
 bus, *isto modo*, verum quæstionem mo-  
 vet, quamobrem carminibus non effe-  
 ret sermones. Quemadmodum quoque  
 Plutarchus in illo opere quo inquirit  
 in causas, cur nunc Pythia sortes non  
 det versibus, idem adfirmat, non tam  
 de suo, quam de prioribus seculis, de  
 qua re in sequentibus amplior dabitur  
 loquendi occasio. Sed nec quæ præ-  
 tenso huic Oraculo tanquam sequentia,  
 ab istis scriptoribus adduntur, satis sibi  
 videntur constare: Narrat enim Suidas  
 Augustum reducem erexit in capito-  
 lio aram cum inscriptione latina: *Hæc*  
*est ara primigeniti DEI.* Quomodo au-  
 tem Augustus ex isto Oraculo cognitio-  
 nem & sensum primogeniti potuerit  
 exculpere, fateor me non videre. Nec  
 de tali aliqua arâ deinceps quidquam  
 est compertum; imo quod palmarium  
 duco, demonstratum hactenus non est,

Au-

Augustum, jam lenem factum, unquam adiisse Delphos, sed nec Græciam adiisse post illam expeditionem, à quâ revertebatur 34 annos ante suam mortem, h. e. 19. ante natum Christum.

### §. VII.

Ex iis quæ hactenus sunt adducta apparet satis illud de Hebræo puerō Oraculum, ante undecimum, post salutarem virginis partum, seculum esse inauditum, adeoque à Cedreno frustra tribui Eusebio; quantumvis id non possit negari, quin pro illa sententia de totali Oraculorum silentio ob & circa nativitatem Christi multis pugnarit Eusebius, ceu videre est ex lib. v. Cap. I. Præpar: Evang: Unde alterum peti solet argumentum pro Oraculorum taciturnitate, quod nunc examini est subjiciendum. Porphyrii, Ethnici & Christianorum impudentissimi obpugnatoris, testimonium ibidem citat Eusebius. verba hæc sunt: *Audi nunc igitur ipsos Græcos fatentes ipsorum defecisse Ora- cula*

cula, neque ab alio unquam adesto, quam tempore salutis & doctrinæ Evangelicæ, quæ unius DEI & Salvatoris Christi fidem per mundum divulgavit, atque omnibus hominibus veluti lux exorta est. Nam statim ergo, ut adhuc nunquam factum est, ostendimus, quomodo post adventum ejus, & Dæmonum mortes narratæ fuerint, & admiranda illa ac decantata Oracula defecerint. Et post pauca: Mortua vero sunt omnia à Dæmonibus profecta Oracula & vaticinia. Neque ex quo tempore, instar lucis omnibus effulsi, aliquis eo usque insanivit, ut Iesus sit cæde illius, quod sibi esset dilectissimum, & hominum mactatione illos, cædem & Sanguinem stientes hominesque odio habentes, placare Dæmonias. Qualia lubentiamino perpetrabant veteres Reges verè Dæmonibus acti & obsecsti. Quod vero mali Dæmones non amplius aliquam vim aut potestatem post servatoris nostri adventum habent, etiam ipse Porphyrius, qui contra nos Dæmonum patronus extitit, adstipulatur; dum in tractatu, quam contra nos conscripsit tali modo loguitur: Nunc vero ipsos admirtio

miratio subit, si per tot annos urbem (loquitur de Româ) morbus occupaverit. Cum non amplius ulla praesentia ibi sit Aesculapii, aut aliorum Deorum: Nam postquam IESUS cultus fuit, nemo aliquid manifestum aut publicum sensit Deorum auxilium. Hancenus Eusebius. Et sanè, si esset indubium circa natales Christi penitus omnia Oracula conticuisse, fateor nullam nos posse comminisci istius silentii causam dignorem augustioreme, quam ipsum Dominum JESUM Christum: qui alias suam in Daemonas potestatem documentis plus quam manifestis & stupendis probavit, dum carne vestitus inter homines visibili modo conversabatur. Verum enim vero quum sit manifestum (quod etiam in sequentibus demonstrabitur) ad quartum usque seculum post Christum natum Oracula non modo esse consulta, sed & respondissie; metuere est, ne Eusebius argumento, quo doctrinam de Christo stabilire nitebatur, potius reddiderit suspectam, quandoquidem

non probabile sit illos, quios Hoc  
suo opere convincere adeoque conver-  
tere fatagebat Eusebius, omnes adeo ob-  
tusi fuisse ingenii & experientiae nul-  
lius, ut non ipsis, vel tantillum subo-  
luerit de vacillante fide istius argu-  
mentationis. Nam ut taceam non po-  
tuisse non piam hanc fraudem, uti il-  
lam nominat alicubi Vossius, esse invisam  
cordatioribus, qui scapham scapham di-  
cunt, nihilque pro canone admittunt ni-  
si de cuius vetustate & traditionis au-  
thoritate satis constat; certè immane  
quantum obstaculum foret illis, qui  
nondum plane de nostra religione e-  
rant persuasi, officias ejusmodi notare:  
utpote qui ex hujsumodi machinationi-  
bus detectis non defficultè essent con-  
cepturi suspicionem falsi de iis quoque  
scriptis, quæ optimæ sunt notæ, vere-  
que Apostolicæ. Quod quoque de  
suo seculo questum esse Tertullianum  
intelligimus, & Origenes lib. 5. contra  
Cellum satis ostendit religionem Chri-  
stianam Ethnicis fuisse ludibrio, quod  
ejus

ejus Antistites adeo faciles fuerint in accipiendo quæcunque offerebantur, quemadmodum quoque Sibyllistæ ab illis audiebant, quod suppositiis Sibyllarum scriptis adeo patrocinabantur.

## §. VIII.

Sed examinemus Porphyrium ipsum, qualis ab Eusebio heic citatur, annon illius testimonio id valeat evincere, quod conatur Eusebius. Porphyrii enim verba ab ipso Eusebio citata nihil aliud innuunt, quam urbem Romanam, postquam coli cœpit Salvator, morbis infestari, Æsculapii præsentiam desiderari & neminem manifestum aliquod & publicum Deorum auxilium sensisse. Quibus verbis nihil quidem de Oraculorum silentio testari Porphyrius videtur, tantum de miseriis & morbis Romanam afflgentibus queri, quarum causam non aliunde autumat petendam, quam ex nova istâ religione, ob quam vult iram & indignationem Deorum in Romanos esse

esse effusam. quæ quidem querelæ i-  
stis temporibus novæ non fuere. Ex  
innumeris enim tam Christianorum  
quam Paganorum scriptis hauriri po-  
test, circa veræ doctrinæ primordia,  
hos apud illos, & versa vice, insigni  
laborasse invidiâ: ante verò omnia Eth-  
nici hostile odium in Evangelicam lu-  
cem agnoscentes exercuere. Quod  
Origenes, Cyprianus, Augustinus atq;  
Tertullianus sciunt recensere. quorum  
postremo nominatus in hæc verba, A-  
polo<sup>g</sup>: Cap. 40. erumpit. At e contra-  
rio illis nomen factionis accommodandum  
est, qui in odium bonorum & proborum conspi-  
rant, qui adversum sanguinem innocentium  
conclamant, pratexentes sane ad odii defen-  
sionem illam quoque vanitatem, quod exi-  
stiment omnis publice cladis, omnis popu-  
laris incommodi Christianos esse causam, &  
quæ sequuntur. Nec minus Christiani,  
ut dictum est, Ethnicos oderunt, quo-  
niam, quicquid gravius perpeſſi sunt,  
mox totius rei culpam imputarunt Pa-  
ganis, quorum quoque, inter alias, que-  
relam

yelam apud Theodosium ex novella III.  
 de Judeis Samaritanis Hæret: commemo-  
 rare non ducimus à re alienum:  
*An diutines perferemus mutari temporum  
 vices, irata cœli temperie? quæ Paganorum  
 acerbata perfidiâ, nescit naturæ libramina  
 servare &c.* Hinc haud difficultè colli-  
 gitur quam invidiosè una pars ærumna-  
 rum culpam in alteram sibi aduersam  
 transtulerit, tanquam si nullum infor-  
 tunium, nullum damnum & nullæ deni-  
 que miseriæ homines ante hoc tempus  
 pressissent. Atque id ipsum videtur  
 questus Porphyrius ; de Oraculo-  
 rum igitur defectu, ab illo, nisi coacto,  
 frustra Eusebius testimonium exspectat;  
 neque enim potuit Porphyrium latere  
 Oracula per varias mundi plagas etiam  
 suo tempore viguisse. Quid autem i-  
 stud est, quod citato à nobis loco Eu-  
 sebius ἀνθρωπίνιαι sive humanas victi-  
 mas eodem tempore dicat cessasse ?  
 sanè ex Taciti, Plutarchi, Plinii & ali-  
 orum benè multorum scriptis patet  
 contrarium, qui amicè consentiunt hunc

horrendum morem ad justinianum,  
 imò ad Henricum Aucupem: quin  
 & in urbe Roma ad ipsius Eusebii æ-  
 tatem perdurasse ex Lactantio, qui ipsius  
 Eusebii coætaneus fuerat, manifestum  
 est. Sic etenim ille lib. I. de falsa reli-  
 gione & Cap. 21. Apud Cypri Salaminem,  
 inquit, humanam bestiam Jovi immolavit  
 Teucus, idque sacrificium posteris tradidit,  
 quod est nuper Hadriano imperante subla-  
 tum. Et post pauca: siquidem latialis  
 jupiter etiam nunc sanguine colitur humano.  
 Quid multis? arguit se ipse Eusebius,  
 cum in libro de laudibus Constantini  
 Porphyrium sic loquentem introducit:  
 Αλλ' ἐπὶ τούτη τις ἀγνοεῖ κατά τὴν μεγάλην  
 πόλιν τῇ τοῖς λαπαρέσ Διὸς εὐρτῇ σΦαγμαζόν  
 μενον ἄνθροπον, h.e. sed etiam nunc quis igno-  
 rat in magna illa urbe (Roma) Jovis la-  
 tiaris festo pro victimâ jugulari hominem.  
 Judiceret benevolus lector, annon hæc  
 & similia saltem ansam queant dare  
 suspicandi Eusebium non usquequaque  
 eā usum esse diligentia & curâ, qualem  
 tale desiderasset negotium.

Jam ad prima citati loci ex Eusebio verba redeamus, quibus asserit, ipsis Græcis patentibus, tempore nati Christi Salvatoris Oracula & vaticinia omnia profecta à Dæmonibus esse mortua. Per *Græcos fatentes* intelligit Porphyrium ( quem quo successu allegat jam vidimus ) & Plutarchum, ex cuius dialogo de Oraculorum defectu historiolæ cujusdam meminit de Pane mortuo. Prius autem quam historiolæ istius, sive potius fabulæ, ut mox demonstrabitur, examen aggredimur, subit mirari, quæ ratio movit virum in omni literaturâ versatissimum, Danielem Huetium, ut ille quoque hoc argumentum, tanquam quod agmen coheret, tam facilis arripuerit, nisi si credendum sit, id eum ideo fecisse, quod homo, catholicæ Religioni addictus, Traditionibus faverit plus justo. Verba ejus sunt Tom: Secundo, Proposit: 9. cap. 37. §. 4. pag. 751. *Huc adjungendus Oraculorum defectus, cuius causam curiose*

scrutati sunt, cum alii scriptores, tum potissimum Plutarchus: ex quo discas paulatim ea conticescere coepisse ad Christi usque tempus quo obmutuerunt: quasi fracta tamen penitus Daemonum vi, silentioque ipsis imposito. Ait hic Plutarchum curiosè scrutatum esse causam defectus Oraculorum, quæ paulatim ait conticuisse donec tempore Christi penitus obmutuerint. Plutarchum itaque adeamus. scripsit ille opuscula de Oraculis duo, quorum prius inscribitur: *Quod nunc Pythia sortes non det versibus.* Alterum est de Oraculorum defectu, quem tractatum non nisi nomine tenus Huetio esse lectum suspicio est non levis. Diversum enim depræhendere licebit Plutarchum ipsum per legenti: nimirum occupatur ille in causa indagandâ, cur Oracula non omnia sed aliqua, non sui temporis, sed ævi omnis, non ubique sed certis in locis cessarint, & alibi emerserint nova. Quemadmodum evanuit Oraculum Themidis, quæ tempore Deucalioneo colebatur in Parnasso, cui successit

cessit Delphicus Apollo; & Tiresiæ O-  
 raculum apud orcohmenos, quod nar-  
 tur: cum multis mortalibus pestilentia  
 interfisse ac in totum exspirasse. vide  
 Plutarchum pag. 541 ex versione Her-  
 manni Cruserii. In eodem etiam tra-  
 ctatu innuit Delphicum Oraculum tem-  
 pore vetustissimum & famâ ( ut ait )  
 illustrissimum à Dracone fœminâ ob-  
 sessum hominibusque aliquando fuisse  
 interclusum. De Amphiarai & Apol-  
 linis apud Tegyras oraculis hæc habet  
 Plutarchus: *Nullo enim nunc loco alio,*  
*quam Lebadiæ Bœotia quærentibus haurire*  
*fortes concedit.* Reliquæ partim silentium,  
 partim solitudo occupat: tametsi bellis Me-  
 dicis claruit non minus Amphiarai oraculum,  
 & apud Tegyras Apollinis &c. ut de aliis nunc  
 nihil dicam quæ emortua scribit. Con-  
 cludit denique non esse ex immortali-  
 bus Diis, eos, qui respondebant peten-  
 tibus consilia, sed esse Dæmonas na-  
 turæ inter homines & Deos mediae.  
 verba illius sunt: *Ex aqua aër, ex aëre*  
*ignis conficitur generari, sursum evolante*

materiâ: sic ex hominibus in heroas, in Dæmonas ex heroibus præstantissimæ anime accipiunt mutationem. Et post pauca: naturas certas esse quasi in Deorum & hominum positas confinio, humanis laboribus & vicissitudinibus obnoxias, quas more institutaque majorum censentes & nominantes venerari debemus. Exemplum dictis his Planis sudalis adduxit Xenocrates triangulorum, qui Deo assimilavit Isopleurum, scalenum mortali, isosceles Dæmonio. Primum enim undique par est, Secundum undiq; impar, tertium partim par, partim impak. Sicut Dæmonum natura, quæ affectu humano & vi prædita est divinâ, &c. Et iterum post aliqua: Audemus post multos nos quoque exponere, Dæmonas qui manteis & oraculis appositi sunt, plane exspirare, & cum his illa, atque quando profugerunt vel migrarunt, vim suam effundere, ubi redierunt post longinquum spatiu[m], sonare sicut instrumenta: quod qui tractare ea, & eis uti valent, præsto sint. Tantum autem abest, ut in istis tractatibus quidpiam dicat de silentio Oraculorum universalis, ut potius

sæpius testetur de Oraculis suo etiam tempore locutis. Ut nihil dicam de Apollinis Oraculo, quod ipsius Plutarchi tempore (h.e. Imperante Trajano) *Lebadie* in Bœotia viguisse audivimus modo: Testatur idem de Delphico his verbis p. m. 527. *Nunc vero vates est una, nec querimur.* *Satisfacti enim hæc consilientibus.* Quin & ibidem Mopsi & Amphilochi Oraculorum in Cilicia meminit, ut quæ ipsius tempore floruerent. ut autem suam de mortalitate Dæmonum probaret sententiam, historiolam illam, quam innuit & citat Eusebius, memorat de mortuo Pane, quæ in eodem ejus de Oraculorum defectu opusculo talis est, Vertente Hermanno Crusero: *De Dæmonum porro obitu historiam ex viro audiri nec siulto nec vano, Æmiliani Rbetoris, quem etiam non nulli vestrum audiverunt, Epithenses, pater fuit civis meus. Et in grammaticis Praeceptor.* Hic narravit, cum aliquando in Italiam navigaret, conscendisse navem sc̄, quæ merces & frequentes vectores portabat. Sub vesper-

rum apud Echinades Insulas cecidisse ventos,  
 nemque hoc illuc jaētam, prope Paxas  
 delatam fuisse: vigilasse autem plurimos,  
 complures etiam abhuc à cœnâ compotasse.  
 Ibi repente exauditam ex insula Paxis vocem  
 cuiuspiam, qui Thamum quendam clamore  
 cieret, ut obstupesceret. Thamus Aegyptius erat  
 gubernator, ne eorum quidem, qui in navi  
 erant, multis de nomine notus. Eum  
 bis appellatum tacuisse, tertio paruisse vo-  
 canti. Tunc illum contentâ voce dixisse: Cum  
 ad palodes perveneris, magnum Pana nun-  
 tia interiisse. Quod qui audiverunt, atto-  
 nitos ostendit Epithenses omnes fuisse ac rem  
 secum perpendisse: facere ne præstaret im-  
 peratum, annon scrutari de eo curiose  
 negligere. Thamum censuisse, si ventus fla-  
 ret ut præternavigarent tacite. Sin tran-  
 guillitas esset silerentque apud eum locum  
 venti, ut pronuntiaret quod acceperat. Ut  
 ad palodes delati sunt, & cecidit ventus, nec  
 fluctus fuit, prospectantem ad terram Tha-  
 mum retulisse, ut acceperat, magnum Pana  
 obiisse. Vix conticuisse eum, cum extitit non  
 unius sed multorum cum stupore confusus  
 gemi-

gemitus. Haec tenus Plutarchus, & adjectum Tiberio Cæsari eadem haec retulisse Thamum, postquam ille rumor Romæ pecrebuit, Cæsarem convocasse suos Sapientes & ex illis didicisse Panem illum fuisse Mercurii & Penelopes filium. Haec illa est narratio, quam de morte & perpetuo silentio oraculorum interpretatur Eusebius & cum illo alii. Boissardus audet explicare de ipso Salvatore Christo ejusq; morte, & quod mirabimur assignare ipsi huic voci certum tempus, nemirum 19 annum Tiberii imperantis, adeo ut mirari satis non possum audaciam viri affirmantis ea, quæ ne per somnium quidem ex Plutarchi (qui solus & primus haec tradidit) scriptis poterunt elici. Boissardi verba sunt, lib. de divinatione & magicis præstigiis: *Quidam existimant vocem illam locutam fuisse de Christi servatoris morte: cum auditæ sit anno decimo nono imperii Tiberii Cæsar is, quo Christus crucifixus est.* Quod quoq; magis exinde putat fieri probabile quod Arcades Pana τὸν μῆνας κύ-

ex eo nuncupavisse testetur. Macrobius sic  
 de Pane Saturnal. i. Cap. 22. differens:  
 Pan ipse quem vocant Inuum, sub hoc habi-  
 tu, quo cernitur; solem se esse prudentioribus  
 permittit intelligi. Hunc DEUM Arcades  
 colunt, appellantes τὸν τῆς ὕλης κύρον: Non  
 sylvarum Dominum, sed universæ substantiæ  
 Dominatorem significari volentes. Cum  
 Boissardo consentit Molinæus sed uter-  
 que, meo quidem judicio; magis confi-  
 denter quam verè. Neq; enim latere  
 potest quam audacter istud Epithesis  
 Aliquando pronunciarit vel finxerit Bo-  
 issardus annum 19 imperii Tiberii Cæ-  
 faris, ut sic sententiæ amatæ patroci-  
 naretur. Sic Dæmones uterentur ope-  
 râ Thami, ut rescicerent antea nescii  
 socii, illis per se non valentibus: Ve-  
 rum unde ejulatus iste multorum § an-  
 mali spiritus mortuo hominum libera-  
 tori illacrymarentur?

*An lacrymantibus his risum teneatis Amici?*

At si cui verosimilius videretur de  
 angelis bonis hæc intellexisse, simul quo-  
 que spiritibus (quod est absurdum) cer-

ta atque destinata terrarum assignaret loca: sicut solitudines horridasque montium rupes incoluisse oportet illos, qui gubernatori Thamo hoc negotium perficiendum mandarunt. Mornæus ait istunc Pana in gentilitiis Dæmonibus insignem locum tenuisse, cuius etiam Oraculum ex Porphyrio citat, sed cum commentariis, adeo ut visus sit timuisse ne injurius diceretur, si mendacium adeò amandasset nudum atque accessit. Sic crevit & vires eundo acquisivit, instar niveæ pilæ, quæ quo volutatur diutius, eo incrementa capit majora. Tamdiu ergo absurdum unum trusit alterum, donec penitus fabula evasit, illa adeò decantata, & ab ipsis credulis tam avidè arrepta, historia.

## §. X.

Sane non defuere ex hujus ævi (quum tertium nos revisunt literæ) literarum luminibus & viris sine exceptione doctissimis, qui diu narrationem habuere suspectam. Inter illos Baronius sic est locutus: *Qualia cunctæ sint*

sint, fides est penes Auctorem, & post pauca: Et sane quidem, si rei gestæ fidem adhibendam esse putemus. Adhuc tamen cordatores judices habendi sunt centuriatores Magdeburgenses, quibus hæc omnia sunt ridicula: nam cent: 1. lib. 2. cap 15. de Eusebio hæc ex Plutarcho in testimonium adducente dicunt. ubi & de pane sub Tiberio mortuo ridicula narrat. Jaçtantur etiam multa alia ipsorum Oraculorum de suo silentio testimonia ex Porphyrio ab Eusebio adducta, quæ tamen ejus sunt indolis, ut, si penitus examinentur, quidvis aliud potius probent, & de temporibus, quibus reddita sunt, nihilo evades certior: hoc unum ex omnibus colligi posse videntur *χρησίεα*, Apollinis præcipue Delphici, nunc per aliquod tempus dedita responsa, nunc rursus per aliquod spatium obmutuisse, idque saepius diversas ob causas accidisse. Potuisse autem Eusebium prætervidere aliqua in iis, quæ hanc rem spectant, etiamnum unico exemplo, sed manifestissimo, de class-

clarabo. Narrat Eusebius (quem error post illum erasse fertur Hieronymus) Josephum Judaicarum rerum scriptorem testari, eodem die, quo crucifixus est Salvator, voces ex templi adytis esse auditas: *migremus hinc.* quam autem id fiat invito Josepho, ipse cognoscere ne graveris, quæso, benigne Lector ex ipsius Josephi lib. 7. de bell. Jud. Cap. (secundum lat: vers:) 12. ubi ille istam vocem annumerat prodigiis, quæ proxime antecesserunt Hierosolymitanæ urbis excidium, quod circiter 40 annos postea contingebat, ut verba apertissime habent, & non potuisset non Eusebius æque videre, ac quivis aliis, si advertere animum voluisset.

### §. XI.

Supereft ut, ceu in nos recepimus, testimoniis scriptorum tam Ethnicorum quam Christianorum demonstremus etiam Juliani Imperatoris tempore & esse consulta & respondisse Oracula: Quod quamvis nunc à nobis debuisset

& potuisset fieri prolixo, erimus tamen  
 breviores, ne in opus excrescat imensum  
 quod esse voluimus exercitiū exiguum.  
 Nec recensemus nisi illa, quæ mihi  
 quidem quantivis pretii visa sunt, se-  
 quentes ordinem Imperatorum, prout  
 Oracula ipsis & consulta & reddita de-  
 præhenduntur. Audivimus superius de  
 tuo tempore(hoc estante natum Salvato-  
 rem) testantem Ciceronem, quod respon-  
 dere quidem non desierint Oracula, sed  
 versibus id non fuisse factum. Apol-  
 linem Delphicum respondisse, testatur  
 Strabo (qui sub Tiberio vixit ) lib. 9.  
 ubi etiam ritus, quibus Oracula suo  
 tempore dari sueverunt, recenset. Ne-  
 ronem quoque itidem primi seculi Im-  
 peratorem, de morte sua consuluisse  
 & ab Apolline Delphico esse delusum,  
 quod non recte interpretatus sit septua-  
 gesimum tertium annum ; quem ca-  
 vendum ipsi præscripsit Oraculum, testis  
 est Sueton: in vita Neronis Cap. 40.  
 Qui tamen Nero templum spoliavit, ut  
 perhibet Patrasias de Neronis in Delphos

patrato facinore. Unde suspicio esse potest Oraculum filuisse ad aliquod tempus & deditisse Juvenali, qui sub Domitiano vixit, occasionem querendi quod *cessent Oracula Delphis.* Neque tamen sic cessasse toto isto à Nerone ad Domitianum tempore suadet Philostratus lib. 6. de vita Apollonii, præcipue vero lib. 4. cap. 8. Quidquid sit, alibi tamen responderunt, nam Vespasianum Patrem confirmatum per Oraculum Carmeli DEI, qvod inter Syriam & Judæam frequentabatur, fatentur Svetonius in ejus vita Cap. 5. & Tacitus Hist. lib. 2. cap. 78. Eius filium Vespasianum itidem de imperio esse, confirmatum Paphiæ Veneris Oraculo iidem testantur, iste quidem in ejus vit. Cap. 5. hic autem Hist. 2. Cap. 3. & 4. Fiebant autem hæc seculo primo post. N. C. Ad quod quoque pertinebit illud, quod de Clitumni Oraculo, suo tempore eximiè vigentis, scribit Plinius secundus (qui sub Trajano vixit) lib. 8. Epist. 8. Plutarchum de secundo seculo, circa

cuius initium floruit, testantem, hic  
 consulo prætereo, quandoquidem ex  
 iis quæ superius de eo allata sunt, pa-  
 teat abunde illum ab adversantibus sen-  
 tentiæ Patronis frustra citari ut testem,  
 quam potius demonstret isthac in o-  
 pere Oracula suo tempore viguisse. Ait  
 enim: *Sed vix datis priscis Antistitis, quod*  
*malis usæ sint versibus, itemque eis que ho-*  
*die profâ oratione responsa dant.* Item  
 alibi: *Neque vero DEUS est culpandus, quod*  
*cum divinationis quod adhuc superest, omni-*  
*um desiderio satisfaciat, absolutosque do-*  
*mum dimittat.* Videsis etiam quæ ha-  
 bet Lucianus non incelebris secundi se-  
 culi scriptor, tam in Philopseude suo,  
 quam Alexandro Pseudomante, ubi  
 plurima enumerat Oracula, quæ suo  
 tempore viguere. At causa ipsorum  
 per aliqua tempora, facti silentii, (ut  
 antea indigitavimus illa ob certas ra-  
 tiones solitum morem non obtinuisse)  
 haud adscribenda est illis, sed quod mi-  
 nor confluxus hominum consulentium  
 eorum visitarit loca; nemini namque  
 per-

percundanti nullum datur responsum. Quamvis etiam alias adferat Plutarchus rationes in opusculis antea laudatis. Et Boissardus prolixè satis hoc Oraculum quinquies relictum everlumque & denuo exstructum, postremo, Juliano imperante restauratum ait fuisse: Qui secundum ejus mentem ultimus Apollinem adivit. In eandem sententiam pendibus it Peucerus lib. 3. Cronic. Verum enim vero utrum brevi an longè post Julianum in solidum destructum sit, pro certo sciri non potest, quandoquidem de eo inter scriptores hactenus convenitum non sit. Ex iis autem quæ dicta sunt, satis adparet neutquam, neq; illud Delphicum, neq; alia illo tempore, cuius meminit Eusebius, in perpetuum esse sopita.

## §. XII.

De tertio seculo hæc habet Tertullianus ( qui sub Severo & Caracalla flouruit ) lib. de anima, Cap. 46. *Nam & Oraculis hoc genus Stipatus est orbis: ut Amphiarai apud Oropum, Amphilochi apud*

*Mallum, Sarpedonis in Troade, Trophonii in Bacotia, Mopsi in Ciliciā, Hermione in Macedonia, Pasiphae in Laconica.* Ut prolixitatis vitandæ gratiâ nunc præteream, quæ de Caracalla Oracula interrogante, & responsis potito, referunt Herodianus & Dion Cassius; qui Cassius item refert Macrinum Caracallæ successorem ab Oraculo didicisse se iri oppressum à puerulō. De Aureliani tempore testis est Zosimus, ipse Ethnicus, qui duorum *xenonem* tempore suo Oracula reddentium meminit: Unum erat Apollinis Sarpedonii Seleuciæ, alterum Veneris Aphacitidis inter Heliopolin & Biblum, à quorum utroque recitat ingrata Palmyrenis data responſa. Vide etiam Eusebium lib. 3. de vit. Constant.

## §. VIII.

Circa initium seculi quarti, quum imperio est admotus Constantinus Christianam fidem amplexus, Oracula quidem videbantur animam aetora, quum ille eorum templa jusserit destrui; retardatus tamen est illius Zelus

lus impedimentis perplurimis : Quin & ab illis, qui ipsi successere, adeò res est tractata languidè, ut quum ad Julianum Apostatam devolveretur imperium, Oracula pristino vigori quasi restituta viderentur. Cen de illis temporibus locuples testis est, Cyri Episcopus Theodoretus , cujus de Juliano Apostata hæc sunt vetba Hist. lib. 3. Cap.9.  
*Julianus cum in animo haberet bellum contra Persas gerere, ad omnia Oracula, quæ erant intra fines Romani imperii, consulenda homines e suis summâ benevolentia sibi conuentos misit. Ille ipse vero supplex orat Apollinem Daphnæum, uti, quæ sibi essent eventura, ostenderet. Respondit Apollo, Mortuos quosdam in proximo humatos impedimento esse quo minus daret vaticinia. Eos igitur pri- mum transferendos, deinde quid futurum sit se prædictorum pollicetur. Nam se, nisi purgato luce, nihil posse dicere. Ibi, sicut alibi, non unius, sed plurimorum Oraculorum, non perpetuæ quondam morti tradita esse, sed tunc temporis viguisse perspicue facta est mentio. His & aliis ad.*

ad huc per plurimis non contemnendo-  
rum scriptorum testimentiis permotus,  
autumno non nisi sub Theodosio, qui circa  
finem seculi quarti cum imperio præ-  
fuit, penitus Oracula obticuisse, ceu viā  
nobis præit Ruffinus lib. II. cap. 19. Hist. Ec.  
*Idolorum*, ait, *Cultus* qui Constantini insti-  
tutione & deinceps negligi & destrui cœptus  
fuerat, eodem (Theodosio) imperante  
collapsus est. idem testatur Zosimus gen-  
tilis lib. 4. Præ omnibus tamen Theodoreto  
Hist. lib. 5. cap. 20. ad quem, quo-  
niā prolixior est, curiosum & Candi-  
dum Lectorem mitto. Oblēcrans reve-  
renter, ut rudia & puerilia hæc, quæ in  
chartam conjeci, eodem Candore acci-  
piat & interpretetur atq; à me scripta  
sunt; benigneque corrigat errantem,  
quemadmodum errare perfacile fuit Ju-  
veni & rerum ejusmodi parum perito,  
parato tamen, divinâ gubernante gra-  
tiâ, quando cunq; docentur,  
discere meliora.

SOLI DEO GLORIA.

Pereximie Dn. RESPONDENS  
Conterraneo & amice sin-  
gularis.

Omn̄es sinceri & pietatis amantes,  
cum aliquid felicis ac boni, qvod  
amico accidit, ad aures pervenerit  
illorum, læto animo ovantes meritò  
gaudent; præprimis autem, Si vel  
per sanguinem vel per vicinitatem  
amicitia vera sit inter illos contracta:  
ego itaque magno effteror gaudio,  
videns te, amice infucate, tantos in  
studiis fecisse progressus, ut jam  
publicè disputationem tuam, de O-  
raculorum post Christum incarna-  
tum responsis, nervosè conscriptam  
defendere tentes: macte Carllööf  
pio incepto tuo. Tibi gratulor,  
gaudensq; opto, dignetur ille sum-  
mus Rector omnium tibi amplius  
scientiam & doctrinam augere, teq;  
D usq;

usq; ad vitæ finem in semitis suæ di-  
vinæ majestati benè placitis cle-  
menter dirigere.

Ita amico suo intimo gratu-

labatur

M A G N U S · Lindbeck / Wermis

---

AD JUVENEM

Ingenio & virtutis amore commendabilem  
**DN. ANDREAM Carillof/**  
Conterraneum & amicum longe probatissi-  
mum, cum dissertationem de Oraculis  
publice & egregie defenderet.

**P**ereximie Dn. Respondens, dies nunc illu-  
xit, quo egregiam hanc materiam de Ora-  
culis, sive Responsis Deorum Gentilium, è ca-  
thedra publica in præsentia Doctorum doctè  
defendere conaris. Ideo temperare mihi non  
possum, quin faciam tibi testatum officium  
& amorem meum, verbo uno vel altero, quod  
amicci solent in tali occasione; & juxta laudem  
sinceritatem tuam, quam in nostra familia-  
ritate nunquam non percepī, ex qvo in Ca-  
rolstdiensī Gymnasio te familiarius uti con-  
tigerat; quam quoque consuetudinem, ad A-  
cademiam hanc Aboënsiem longe celeberrimam  
paupertas ipsa, qvæ mihi tecum commu-  
nis est, fecit arctiorem. gaudeo autem te in tan-  
cum

tum esse eluctatum, ut nunc queas tam egregio  
specimine docere virtutem quidem posse ege-  
state premi, non tamen opprimi penitus. Gau-  
deo inquam mihi, & gratulor tibi, non minus de  
prudenti Consilio, quam laudabilibus studiis.  
Optoq; ut pergas in posterum ceu cœpisti, do-  
nec fructum capias uberrimum: cui egregio tuo  
proposito Deus T.O.M. benedictionem addat  
largissimam!

*Affectu prolixiori quam verbis  
festinus scripsit*

*JONAS Carlhamn Wermel.*

---

In Dissertationem eruditam,

*Eximii Præstantissimique*

*DN. ANDREÆ Carllööf/*

Amici singularis & popularis dilectissimi.

*T*endit, humum linquens, ad cœli culmina  
virtus.

*Tendit, & æternas provida querit opes.  
Huc, Carllööf/ etiā tendit tua fervida virtus,*

*Huc te divine semina mentis agunt.*

*Nam quod contendis musarū ad culmina solers,*

*Egregie, præsens pagina, scripta docet.*

*Gratulor: Et cœlum sincerâ mente fatigo,*

*In cœptis crescas sic magis atq; magis.*

*Amicitiaæ sinceriq; affectus ergo  
relinquere voluit*

*SVEN. Dahlman Wermel.*

## Eidem,

**Q**ui cupit ad celsi contendere culmina Pindi,  
Et sacra Piërii tecta subire chori.

**N**on dubia incertis per compita passibus erret:  
Sed mediâ cautus prodeat usque viâ.

**Q**uae licet acclivis durisque sit obsita spinis,  
Si benè carpatur, redditur æqua tamen.

**E**n via, quam firmis, mi<sup>r</sup> Caribb<sup>s</sup>/ gressibus  
instas,

Quam fuit acclivis duraque s<sup>p</sup>e tibi!

**S**ors inimica tamen vix tanta repagula ponet:

Quin Juga Caſtalidum scandere ritè queas.

**Q**quam vel nunc sortem docta hæc Oracula  
mutant:

De sortis certâ ne vereare fide.

**S**i modo tu pergas quo te vocat ardua virtus.

Perge,] nec à coepta digrediare viâ.

**S**ic tandem Aonii consenso vertice montis,

Præmia pro meritis Pallade dante feres.

*Candido affectu accinebas*

*JON. EMZEE N.*

